

لما قابلتك

مين قالك أني عرفتك يوم ما قابلتك
مين قالك يومها إن أنا حبيتك ؟
مين قالك إني عشقتك يومها
مين قال البذره اتغرست جوا قلوبنا
أنا لما قابلتك
كنت بحبك قبل ما اشوفك
كأني زرعت بإيدي قطوفك
و ضلوعي حصونك .. سكنك .. بيتك
كانت محفوره في قلبي ملامحك
و كل كلام بتقولوا شفائيك
أنا لما قابلتك مش حبيتك
أنا لما قابلتك يومها لقيتك
أنا قبل ما أقابل
كان جوايا عشقك طارح

كان مرسوم جوايا ملامح
كأنك كنتي معايا امبارح
كُنْتِ الأَرْضِي ... و كنت شهيدك
كُنْتِ الأم ... و كُنْتِ وليدك
كُنْتِ الملكه
و أنا واحد من ضمن عبيدك
كُنْتِ الجارِيه
و كنت أنا سيدك
كنت بلف الدنيا عشانك
و أنا مش عارف حتي مكانك
ماشي اغني باسمك غنوه
و كل ما يخلص اسمك اعيدك
قبل ما أقابلك ... كنت بريدك
كنت بحس بلمسة إيدك

جوا عيوني حافظ رسمك
كان جوايا حروف من اسمك
كان دفيان القلب بشمسك
كان جوايا بينبض قلبك

ودمي بيجري جوا ويريدك ..
بس تعبت و نزلوا دموعي
ليه بتحاولوا تطفوا شموعي
ردوا وقالوا محدش عارفك
أصل احتاروا كثير مع وصفك
سألوني أزاى هصبر و أستني ؟
أوصافها .. دي من حور الجنه
مشيت اتغزل و اوصف صورتك
و صدفه قابلتك ...
و أما قابلتك مش حبيتك
لما قابلتك يومها لقيتك ...

